

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- मुख्य सचिव ते मुख्य चुनां अधिकारी होरें मौसम ते शिड़कें दे हलात दी तफसीली रिपोर्ट चुनां आयोग गी भेजी दित्ती ऐ। चुनां आयोग अनंतनाग लोकसभा सीट पर चुनां करोआने बारे तौले गै फैसला लैग।
- प्रशासनिक सचिवें गी आदेश दित्ते गे न जे ओह जम्मू ते श्रीनगर, दौनें सचिवालयें च अपनी मजूदगी गी जकीनी बनान।
- प्रधानमंत्री नरेन्द्र मोदी होर अज्ज ते कल कर्नाटक च पंज रैलिएं गी संबोधत करगंन।
- मुख्य सचिव होरें कश्मीर च हाड़ें दे प्रबंधन ते बचाह योजना दी समीक्षा कीती। उनें व्यवसायिक कोर्सें च दाखलें ताईं मतेयान लैने आले बोर्ड बीओपीईई दे कम्मकाज दा बी जायजा लैता।

<><><><><><>

Rajouri-Anantnaag

जम्मू कश्मीर दे मुख्य सचिव अटल डुल्लू ते मुख्य चुनां अधिकारी पी.के.पोले होरें अनंतनाग-पुंछ-राजौरी संसदी हल्के च मौसम ते शिड़क दी स्थिति बारे सरबंधत अधिकारिएं थमां जानकारी हासल करने परैत भारती चुनां आयोग गी तफसीली रिपोर्ट भेजी दित्ती ऐ। इस हल्के च त्रिए गेड़ तैहत 7 मई गी वोट पोआए जाने न। एहदे शा पैहले अनंतनाग सीट दे रिटर्निंग अफसर सैयद फखरुद्दीन होरें इक बैठक सद्दी जेहदे च सब्बनें सियासी पार्टिएं दे मेदवारें जां उंदे नुमायंदे हिस्सा लैता। रिटर्निंग अफसर होरें संसदी हल्के च मौसम ते शिड़क दी स्थिति बारे उंदी राय हासल कीती। मुख्य सचिव ते मुख्य चुनां अधिकारी होरें सब्बनें सरबंधत धड़ें थमां मौसम ते शिड़कें दी स्थिति, जेहदे च अनंतनाग गी पुंछ-राजौरी कन्नै जोड़ने आली मुगल रोड बी शामिल ऐ, दे बारे च व्यापक रिपोर्ट हासल कीती। मेद ऐ जे चुनां आयोग इस संसदी सीट लेई मतदान बारे इक-दऊं दिनें च कोई मुक्कदा फैसला लैग। उआं फिलहाल इस सीट लेई 7 मई गी मतदान होना ऐ।

<><><><><><>

Expenditure Observer

अनंतनाग—राजौरी संसदी हल्के लेई खर्चे सरबंधी निगरान श्याम मनोहर सिंह होरें कनून नाफत करने आली टीमें कन्ने इक बैठक लाइयै चुनावी खर्चे कन्ने सरबंधत भारती चुनां आयोग दे नियमें दी अमलावरी दा व्यापक जायजा लैता। इस मौके उनें सरबंधत टीमें दे कम्मकाज दी समीक्षा कीती ते हर इक टीम नै अपनी भूमका ते जिम्मेदारिएं बारे उनेंगी जानकारी दित्ती। खर्चे सरबंधी निगरान होरें भारती चुनां आयोग दे दिशा—निर्देशों दी पालमा दे मळतव उप्पर जोर पाया ते आक्खेआ जे चुनाएं गी रमानदारी ते बवस्था आले ढंगै सिर करोआने च सब्बनें धड़े दी भूमका बड़ी महहत्वपूर्ण ऐ।

<><><><><><>

Adm. Summer

जम्मू कश्मीर सरकारै सब्बै प्रशासनिक सचिवें गी औंदी पैहली मई थमां सिविल सचिवालय श्रीनगर च अपनी हाजरी जकीनी बनाने दा निर्देश जारी कीता ऐ। प्रशासनिक सचिवें गी कम्में दी लोड़ मताबक सिविल सचिवालय जम्मू च मजूद रौहने लेई बी आक्खेआ गेआ ऐ। इस सरबंधै च जारी इक आदेश च आक्खेआ गेआ ऐ जे सैक्टरेट दौनें थाहरें पर कम्म करोग ते प्रशासनिक सचिव दौनें थाहरें पर दफतरें दे बवस्था आले कम्मकाज गी जकीनी बनागंन।

<><><><><><>

PM-Karnatka

प्रधानमंत्री नरेन्द्र मोदी होर अज्ज ते कल बी कर्नाटक च 5 रैलिएं गी संबोधत करगंन। मोदी होर ओकड़े लोकसभा हल्के च प्रचार करा'रदे न जित्थें 7 मई गी मतदान होना ऐ। प्रधानमंत्री होर अज्ज बडलै बेलागावी च इक जनसभा गी संबोधत करा करदे न। एह्दे मगरा ओह् उत्तर—कन्नड़ लोकसभा हल्के च सिरसी जांगन ते दपैहरी इक जनसभा अग्गे भाषण देंगन। एह्दे परैंत ओह् देवांगीरी जांगन ते मगरा बेल्लारी च अज्जै दी खीरली रैली गी संजा'लै संबोधत करगंन। मोदी होर कल बागलकोट च बीजेपी मेदवारें लेई इक रैली गी संबोधत करगंन।

<><><><><><>

Amit Shah

केन्द्री मंत्री अमित शाह होरें कल लोकें अग्गें अपील कीती जे ओह् देसै गी आतंकवाद, नक्सलवाद ते गरीबी थमां छुटकारा दोआने दे कन्नो कन्नी भारत गी दुनिया दी त्रीह सब्बने शा बड्डी अर्थबवस्था बनाने लेई नरेन्द्र मोदी होरें गी त्रीह बारी प्रधानमंत्री बनान।

उनें गलाया जे जंदे 10एं बरें च श्री मोदी होरें वोट बैंक दी परवाह कीते बगैर गै दफा 370 गी हटाने ते अयोध्या राम मंदर निर्माण सनें नेकां सख्त फ़ैसले लैते न। केन्द्री मंत्री मनसुख मांडविया हुंदे ताईं समर्थन जुटांदे होई गुजरात दे पोरबंदर च इक जलसे च बोलदे होई उनें इब्बी गलाया जे दऊं गेड दे मतदान परेंत एह साफ होई गेआ ऐ जे देसै दे लोकें इक बारी परतियै मोदी होरें गी सत्ता च आन्नने दा फ़ैसला लैता ऐ।

<><><><><><>

Ramban Adm.

परनोट च जिमीं धस्सने परेंत रामबन प्रशासन मकामी पंचैत थमां सब्बने प्रभावत परोआरें गी राहत ते मदाद उपलब्ध करोआ करदा ऐ। प्रशासन नै प्रभावत परोआरें गी मैत्रा दे सामुदायिक हाल च आरजी आसरमे च ठैहराए दा ऐ। राश्ट्री आपदा राहत बल एनडीआरएफ राज्य आपदा राहत बल एसडीआरएफ, जम्मू कश्मीर पुलस ते होर नेकां टीमां बचाह अभियान पर कम्म करा करदियां न। प्रभावत लोकें दी सेहत सरबंधी जरूरतें गी पूरा करने ताईं इक सेहत कैंप बी लाया गेआ हा, जित्थें के उनेंगी साफ सुथरी ते बेले सिर रुट्टी उपलब्ध करोआने आस्तै हर रोज 24 घेंटे लंगर दी बी बवस्था कीती गेदी ऐ।

<><><><><><>

PTMS Doda

डोडा जिले च सरकारी स्कूलें आस्सेआ बच्चें दे माता-पिता ते अध्यापकें बशकार बैठकें दा सरिस्ता कीता जा'रदा ऐ तां जे शिक्षा प्रणाली दी स्थिति बारे प्रतिक्रिया ते मशवरे हासल कीते जाई सकन। इनें बैठकें दा विशे-सार हा-“बच्चें अंदर जीन जीने दे हुनर विकसित करने च अभिभावकें दी भूमका”। एहदा मुख मकसद शैक्षणिक ब'रे 2024 लेई स्कूलें च बद्धोबद्ध बच्चें दा दाखला जकीनी बनाना ऐ। अभिभावकें थमां थहोई दी प्रतिक्रिया कन्नै सरकारी स्कूलें च शिक्षा दे मयार गी बेहतर बनाने च मदाद मिलोग।

<><><><><><>

CS Flood

मुख सचिव अटल डुल्लू होरें सिंचाई ते हाड़ेंदी रोकथाम सरबंधी मैहकमे दे अफसरें कन्नै कल लग्गी दी इक बैठक दी प्रधानता करदे होई कश्मीर घाटी च हाड़ प्रबंधन ते बचाह सरबंधी विकसित कीते जा'रदे हीलें दा जायजा लैता। उनें घाटी च हाड़ें कन्ने निबड़ने लेई असरदार रणनीति बनाने दी वकालत कीती। श्री डुल्लू होरें गलाया जे हाड़ इक नेही क्रोपी ऐ जेहदे कन्नै होने आले नुक्सान गी घट्ट करने लेई पैहले शा गै तैआरी करनी लोड़चदी ऐ। उनें जिलें च हर उस इलाके दा खाका तैआर करने दा आह्वान कीता जित्थें हाड़ें दे औने दी शैका ऐ तां जे ओहदे मताबक कम्म कीता जाई सकै।

श्री डुल्लू होरें घाटी दे सब्बने डीसीएं ते डिवीजनल कमीशनरें गी कुदरती क्रोपिएं कन्नै असरदार ढंगे नै निबडने लेई बेहतर योजना बनाने दा आह्वान कीता।

<><><><><><>

CS BOPEE

मुख्य सचिव अटलडुल्लू होरें जम्मू कश्मीर दे कालजें च व्यवसायिक कोर्से च दाखले सरबंधी मतेयानें आस्तै लोड्दिएं तैआरिएं दा जायजा लैने लेई व्यवसायिक कोर्से च दाखले लेई मतेयान लैने आले बोर्ड बीओपीईई दे अफसरें कन्नै लग्गी दी इक बैठक दी कल प्रधानता कीती। श्री डुल्लू होरें बोर्ड आस्सेआ लैते जाने आले मतेयानें ते दाखले दे कलंडर दी समीक्षा कीती। उनें बी'टे, एमडीएस, एम.ढससी नर्सिंग, डीएनबी ते होर दुए कोर्से च खाली पेदी सीटें पर संजीदगी दस्सदे होई चैता प्रगट कीती। मुख्य सचिव होरें गलाया जे इनें व्यवसायिक कालजें च लोड्चदा बुनियादी ढांचा मजूद ऐ ते इस चाल्ली दे कार्से च दाखले लेई मेदवारें गी प्रोत्साहित कीता जना लोड्चदा ऐ। श्री डुल्लू होरें ब'रे च रंभ च बीई, बी-टैक कोर्से च खाली सीटें गी पुर करने लेई हर मुमकन गैह पुट्टने दी सलाह दिक्ती।

<><><><><><>

Justice TR

जस्टिस ताशी रबस्तान जेहडे जिला जम्मू दे प्रशासनिक जज बी ऐन, होरें कल मुंसिफ कोर्ट अखनूर दा दौरा लाया ते उत्थें बना करदे अदालत दी नमीं परिसर इमारता दे कम्में दा जायजा लैता। न्यायमूर्ति ताशी रबस्तान होरें मौके पर गै पीडब्ल्यूडी दे अफसरें ते ठेकेदारें गी परियोजना गी तैह समें दे अंदर अंदर तोड़ चाढने दे निर्देश जारी कीते। उनें कम्में दी स्थिति बारे नियमित वक्फे परैत रिपोर्ट जमा करोआने लेई बी आक्खेआ। मगरा न्यायमूर्ति होरें बार एसोसिएशन अखनूर दे मिंबरें कन्नै गल्लबात कीती ते उनेंगी पेश आवा'रदिएं दिक्कतें-परेशानिएं गी धरोइयै सुनेआ ते उंदा तौले हल करने दा भरोसा दोआया।

<><><><><><>

Vaccination Haj

इस ब'रे हज करने जा करदे अकीदतमंदे लेई जिला अस्पताल किश्तवाड़ च कल इक टीकाकरण कैप दा सरिस्ता कीता गेआ। किश्तवाड़ दे डीसी डॉ. देवांश यादव होरें कैप दा जायजा लैता ते किश्तवाड़ थमां हज करन जा करदे यात्रिएं लेई कीते गेदी सहूलतें दी बी समीक्षा कीती। अकीदतमंदे कन्नै गल्ल करदे होई उनें पवित्र हज यात्रा 2024 ताई बघाई दिक्ती।

श्री यादव होरें उनेंगी आक्खेआ जे ओह लोके दी भलाई—बेहतरी ते खुशहाली लेई दुआ करन। ध्यानजोग ऐ जे जांच परैंत जिले थमां 66 जनें दी पवित्र मक्का हज यात्रा लेई ताल कीती गेदी ऐ।

<><><><><><>

Weather

भारती मौसम विभाग नै हिमाचल प्रदेश, उत्तराखंड, जम्मू कश्मीर, गिलगित, बल्तिस्तान ते मुज्जफराबाद च कल बरखा ते किश थाहरें पर ऐन—गड़ा पौने दे असार जताए न। मौसम विभाग नै अगले 2 शा 3 दिनें दरान पूर्वोत्तर भारत दे राज्ये च बरखा, ऐन ते शमानी बिजली पौने दी भविक्खवाणी बी कीती ऐ।

<><><><><><>

IPL

आईपीएल क्रिकेट च अज्ज गुजरात टायटंस दा मकाबला रॉयल चैलेंजर्स बेंगलोर कन्ने अहमदाबाद च होग। एह मैच दपैहरी साढे 3 बजे शुरू होग। इक होर मकाबले च चेन्नई सुपर किंग्स ते सनराइजर्स हैदराबाद बश्कार संजा साढे 7 बजे थमां चेन्नई च मैच होग। प्रतियोगिता च कल खेड्डे गेदे मैच च राजस्थान रॉयल्स नै लखनऊ सुपर जायंटस गी 7 विकटें कन्ने हराई दित्ता। राजस्थान नै 197 रंजे दा लक्ष्य 3 विकटां मुआइयै हासल करी लैता।

<><><><><><>